



Komunikadu Imprensa

28 Setembru 2018

Parlamentu Nasionál

Komisaun F Parlamentu Nasionál apresia ho deskobrimentu JSMP nian durante monitorizasaun Parlamentu Nasionál hodi konsidera asuntu balun ne'ebé kabe ba Komisaun nia àrea kompeténsia

JSMP iha 27 Setembru 2018, halo audénsia ho Komisaun F Parlamentu Nasionál ne'ebé trata ba asuntu Edukasaun, Saúde, Seguransa Sosiál no Igualdade Jéneru. Objetivu hosi audénsia ne'e mak atu apresenta rezultadu monitorizasaun no deskobrimentu sira ne'ebé JSMP hetan durante tinan 8 halo monitorizasaun iha Parlamentu Nasionál.

Asuntu sira ne'ebé JSMP foti iha audénsia ne'e mak hanesan Programa Lejizlasaun Nasionál, kestaun interpretasaun ba imunidade membru Parlamentu no membru Governu no nesesidade ba halo matadalan ida ba interpretasaun, kestaun pontualidade no dixiplina deputadu sira-nian, kestaun falta la iha justifikasaun, kestaun ezbosu lei sira tenke disponivel iha Tetun no Portugés, kestaun lei pendente no kadukadu sira hanesan Lei Anti-Korrupsaun, Lei Orden Advogadu no Lei Protesaun ba Labarik, kestaun alterasaun ba lei ezistente sira mak hanesan Lei Pensaun Mensál Vitalísia hodi haree fali kestaun “direitu adkeridu”, Kódigu Penál hodi inklui inestu hanesan krime no Kódigu Sivíl hodi inklui konfisaun relijiozu sira seluk aleinde Katóliku. Aleinde ne'e, JSMP mós temi kona-ba espasu ka fasilidade ne'ebé adekuadu ba deputadu sira iha Parlamentu Nasionál.

Deskobrimentu sira ne'ebé JSMP hato'o iha audénsia ne'e hetan apresisaun husi deputadu sira no konsidera asuntu sira ne'ebé JSMP levanta importante tebes ba sira atu tau antesaun, liu-liu liga ho sira-nia área kompeténsia. Asuntu sira ne'ebé membru sira Komisaun F iha interese atu foti mak asuntu inestu, Lei Protesaun Labarik, asuntu kazamentu iha Kódigu Sivíl nomós asuntu língua no fasilidade ba deputadu sira PN no asuntu sira seluk sei kabe ba Komisaun sira seluk.

Relasiona ho proposta Lei Protesaun Labarik no alterasaun ba Kódigu Penál, Prezidente Komisaun F husu ba JSMP atu apresenta submisaun hodi ajuda deputadu sira bele aselera prosesu diskusaun.

“JSMP apresia aas tebes konsiderasaun no disponibilidade deputadu sira-nian, partikularmente Komisaun F hodi bele marka audénsia ida ne'e nomós tau konsiderasaun ba asuntu balun ne'ebé hato'o. Asuntu sira ne'ebé JSMP hato'o iha audénsia ne'e nu'udar parte ida hosi JSMP nia kontribuisaun ba hadi'a funsionamentu no servisu Parlamentu Nasionál nian nomós hodi aselera prosesu lejizlativu ba lei importante sira no hadi'a enkuadramentu legál ezistente sira hodi bele hatan no releta ho di'ak liu realidade no nesesidade povu tomak nian,” dehan Diretór Interinu JSMP, Casimiro dos Santos.

Aleinde ne'e, parte hosi asesoria Komisaun nian hetan biban hodi halo esplikasaun kona-ba interpretasaun no prátika Parlamentu Nasionál nian relaciona ho asuntu imunidade no pensaun mensál vitalísia. Tuir interpretasaun no prátika ne'ebé iha katak imunidade ba membru Governu ne'ebé hetan akuzasaun definitiva ba krime ne'ebé nia pena ba prizaun aas liu tinan rua hanesan prevee iha Artigu 113.1 no Artigu 114 Konstituisaun RDTL nomós Artigu 26.1 & 2 Lei Nú. 7/2007 sei la suspende automatikamente hanesan saida mak JSMP interpreta, maibé sei nafatin kompete ba Parlamentu Nasionál hodi deside ho obrigatoriamente suspende nia imunidade hodi bele ba tuir prosesu justisa.

Mezmu nune'e, JSMP nafatin ho nia pozisaun katak provizaun sira iha Konstituisaun no Lei la prevee kona-ba kompeténsia Parlamentu Nasionál nian hodi suspende ka hasai imunidade membru Governu ne'ebé hetan akuzasaun definitiva ba krime ne'ebé pena prizaun aas liu tinan rua. Bainhira membru Governu ida hetan akuzasaun definitiva ba krime sira hanesan ne'e, imunidade ne'e sei suspende automatikamente hanesan provizaun sira tuir mai ne'e:

“O membro do Governo acusado definitivamente por um crime punível com pena de prisão superior a dois anos é suspenso das suas funções, para efeitos de prosseguimento dos autos (Artigo 113.1 Konstituisaun no Artigu 26.2 Lei Nú. 7/2007) “ (Membru Governu ne'ebé akuzadu definitivamente ba krime ruma ne'ebé nia pena prizaun aas liu tinan rua sei suspende hosi nia funsaun sira hodi halo prosesu ba nia aktu sira).

“Nenhum membro do Governo pode ser detido ou preso sem autorização do Parlamento Nacional, salvo por crime a que corresponda pena de prisão cujo limite máximo seja superior a dois anos e em flagrante delito (Artigo 114 Konstituisaun no Artigu 26.1 Lei Nú. 7/2007)” (La iha membru Governu ida mak hetan kaer ka hatama ba prizaun laho autorizasaun Parlamentu Nasionál nian, ezetu (kecuali) ba krime ne'ebé korresponde ba pena prizaun ne'ebé limite másimu aas liu tinan rua).

Artigu 114 Konstituisaun no Artigu 26.1 Lei Nú. 7/2007 nian ne'e atu halo klaru liu tan Artigu 113.1 Konstituisaun no Artigu 26.2 Lei Nú. 7/2007 katak Parlamentu Nasionál só foin bele ezerse nia kompeténsia atu deside hodi suspende ka la'e imunidade membru Governu ida nian bainhira membru Governu ida hetan akuzasaun definitiva ba krime sira ne'ebé nia pena prizaun hosi tinan rua tun mai kraik hanesan prevee iha Artigu 113.2 Konstituisaun RDTL no Artigu 26.3 Lei Nú.7/2007 no bainhira aas liu hosi ida ne'e Parlamentu Nasionál sei la iha kompeténsia atu deside ka imunidade automatikamente suspensu.

“Em caso de acusação definitiva por crime punível com pena de prisão até dois anos, caberá ao Parlamento Nacional decidir se o membro do Governo deve ou não ser suspenso, para os mesmos efeitos” (Artigo 113.1 no Artigu 26.2 Lei Nú. 7/2007). (Iha kazu akuzasaun definitive ba krime ne'ebé bele kastigu ho pena prizaun to'o tinan rua, sei kabe ba Parlamentu Nasionál hodi deside se membru Governu ne'e tenke suspende ka lae hodi halo prosesu).

Tanba iha interpretasaun ne'ebé oioin no la klaru ne'e mak JSMP rekomenda atu Parlamentu Nasionál bele halo semináriu no “workshop” ruma hodi bele dezenvolve matadalan ida ne'ebé ho interpretasaun klaru ba suspensaun ba imunidade ba membru Governu no membru Parlamentu.

Enkuantu kestaun “direitu adkeridu” ne'ebé ligadu ho pensaun mensál vitalísia, hosi parte asesoria nian dehan katak iha Estadu Direitu Demokrátiku hanesan prevee ona iha ita-nia Konstituisaun, direitu sira ne'e la bele halo lakon no lei ne'ebé foin mosu la bele aplika fali ba kotuk ka retroativa.

Mezmu nune'e, JSMP nafatin hanoin katak la iha valór ka prinsípiu ida ne'ebé absoluta ne'ebé la bele hadi'a ka muda. Desizaun polítika, enkuadramentu legál, valór no prinsípiu sira ne'ebé ita kria iha nia fin último mak asegura interese nasionál ka interese Estadu ka ema hothotu nian iha tempu badak no tempu naruk. Bainhira iha desizaun polítika ruma ka enkuadramentu legál ka valór ka prinsípiu balun ne'ebé sei lori risku boot ba Estadu-nasaun iha futuru iha termu pezu finanseiru ne'ebé Estadu tama ba kategoria Estadu falladu, di'ak liu antesipa hodi hadi'a kedas, duke husik risku ne'e akontense uluk.

Enkuantu asuntu dokumentu no sertifikadu kazamentu ne'ebé prevee iha Kódigu Sivíl, parte asesoria nian hatan totalmente ho JSMP atu hadi'a lei ne'e tanba provizaun ida ne'e konsidera válidu de'it dokumentu sira hosi kazamentu Katóliku, kazamentu sivíl no barlakeadu, no ida ne'e viola ona Konstituisaun tanba laiha provizaun ida kona-ba relijiaun ofisiál. Konstituisaun Timor-Leste nian ne'e “laiku” ka la iha relijiaun ofisiál, ne'eduni tenke konsidera profisisaun relijiozu sira seluk hanesan saida mak JSMP rekomenda no halo advokasia ba.

Iha inseramentu, Prezidente Komisaun F, Distinta Deputada Maria Gorumali Barreto haktuir katak hanesan deputadu foun sira simu rekomendasau ne'ebé JSMP hato'o ona no sei konsidera asuntu sira ne'ebé kabe ba kompetensia servisu komisaun F nian no sira husu atu JSMP kontinua tau matan ba sira nia servisu hodi fó hanoin atu hadi'a di'ak liutan servisu Parlamentu no Komisaun F nian.

Atu hetan informasaun kle'an liu tan favor kontaktu:

Luis de Oliveira Sampaio
Diretór Ezekutivu JSMP
Telefone: 3323883
www.jsmp.tl